



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma : Tir Yimym

tiryimym@aolima

tir yimym

TAPAK 8

Tripura: Küm 2 sülen Srinagar  
Border Haat lapokshitsü

Nüngtugu Boxer Kaur  
Singhsüogo



VOL. XX NO. 195 (ADOK 195) DIMAPUR ROGONÜ (FRIDAY)

RONGCHII (APRIL) 28, 2023

₹ 5.00

## AIR Mon aser Tuensang nung FM semzüksü

**Kohima, Rongchii/April 27 (TYO):** Mon aser Tuensang nung mapang talangka nungi bongmang ama aliba asangsang kuma April 28, 2023 anepdang 10:30 ako nung India Ato Kilonseri par kidang nungi linük tesem ajungalen asoshi 91 100W FM Transmitters semzüksütsü.

Iba nüngtem nung AIR Mon aser AIR Tuensang nung sentong ka ayongzüka lir, ta PBI Kohima sangdong ka ajanga ashi.

Iba sentong nung Rajya Sabha MP, Phangnon Konyak-i shilem agitsü.

AIR Mon aser Tuensang

nung iba transmitters semzüksütsüba mapang district anaprong nung sorkar ketdangsür aser tongtipang nisungtem arua adentsü.

Mon aser Tuensang nung transmitter ya FM frequency 100.1 MHz nung angutsü aser iba ya ajanga nübür dangi entertainment aser education tsütsü sentong balala bener arutsütsü.

Iba 100W Transmitter ya 400 Sq. km area nungi angashitsü imlar aser anasa jila aser yimsüngtem nungi radio angar meyririjang aika ajangzüksütsü.

## Dimapur gari lendong nung nisung ka asü, ana yiru

**Dimapur, Rongchii/April 27 (TYO):** Dimapur Police ajanga sangdong ka nung ashiba agi, April 27, 2023 anepdang 11:04 ako meta 6th Mile nung JCB showroom anasa gari lendong ka ataloka lir ta osang aru.

Iba sülen duty nung alirtem lendong atalokba tesemi ao aser Baleno gari (registration No. NL02CA2113) kati Piaggio Auto (registration No. NI.07F3401) dak tesülen oa atsük ta jangjatet.

Kanga sashia atsükba agi auto ya lenmang abelen leni nunger ao aser auto anisang ya abelen tsütsü nungteta yok. Auto anisang ya abelen tenarong anasa tekoka yirua yangji asü. Baleno gari yagi ano lenmang tezülen footpath railing nung oa atsük.

Baleno anisang aser pa den mena alila (pa kinungtsü) tenaprong kanga sashia yiru aser tena den auto driver ya CIHSR

Hospital bushia anir ao, saka auto driver ya tasü bener aru ta sangdonga liasü, ta Dimapur Police ajanga ashi.

Tasüsang auto driver ya arishi küm 45 tain Abdul Malik, S/o Najar Ali Village of Chutiya Gaon, PO/PS Lahorijan, Dist. Morignon, Permanent Address, Burma Camp, Dimapur ta jangjatetogo.

Auto driver ya kinungtsü ana aser arishi küm 10-12 tsüngta tanur ana yutsür asü. Post Mortem examination agitsü memolungba agi ozüng agi melaba maparen ajak temer tasüsang ya par kinunger nem agütsüogo.

Iba tatalokba ya tapet temzüng-ozüng kübok Chumoukedima Traffic Control nung benoka lir aser bushisüngdangba mapang lir, ta sangdong ajanga ashi.

## Totzü bushitsü atema NCP-i jembiba sasatsür: WC, NNPGs

**Dimapur, Rongchii/April 27 (TYO):** WC, NNPGs ajanga sangdong ka nung ashiba agi, 1857 küm Plassey tongpang sülen British Raj mesüra colonialists temi India nung century ka jungnüa 147 tashi yimsü süa aru. Parnoki anüdoklen yimli ulushitsü tejangraba tulu liasü. Parnoki shinga küboka maliba tasü tait Naga nunger madak takok ngur par küboki aita daksütsü tejangraba anema kanga sashia nokdak. Tesem kar parnoki koktet. Tetetzü tang WC, NNPGs aser Government of India tsüngta ken o jembiba ya India nunger nüjiso mangudang nungi yimtenren tsütsü mangatetep adoka aliba angatetepsü asoshi lir, ta sangdong ajanga ashi.

Assam aser Naga nunger tesem nung totzü bushitsü atema MoU züluteptsü atema NCP aser mesüngjemteti senzürtem aser lokti tentet temi mezüngbuba nung Nagaland nung aliba nübür dang telangzüba agütsütsüla, ta ashi.

Otsü ya tejangja, totzü aliba

tesemtem Nagaland indang lir, totzü atsüba company aser Assam sorkari NCP mesüra Nagaland state sorkar nem sen kwi agütsü? Naga nunger aliba tesem nungi sentep sür totzü agitetsü khen nung Assam sorkar nem temeden agütsüba ya mapa tamajung inyakba lir, koba khenyongi magizükter, ta WC, NNPGs ajanga ashi.

Indo-Naga political solution ya kanga yongya atateper, aser Nagaland aser Assam tsüngta arütsü mangatetep ta jembiba ya jembitema aliba ama 'third neutral central body' kati bentetsü.

MoU züluteptsü aliba ya ajanga ano dangalen totzü aliba Naga nunger tesem nung kibur adoktsü ajungmesor. Jenjang talang yong Naga nunger rongsen yoka achiba ajanga asen puti otsü temeden mezüngmeshir. Külemi totzü bushiba ya tematiba jenjang nung ashikülak mapa inyakba asütsü. Iba tezüngzüktep ya agientsüla, ta sangdong ajanga ashi.

Nagaland aser Assam tsüngta arütsü ken o bentetsü asoshi lenmang sadema lir, aser GoI aser

## NPS kübok sorkar mapa inyaker temi OPS dangi meyiptsü pangjem



NMOPS aser CANSSEA ketdangsür temi Kohima nung April 27, 2023 nü osangbener den jembidang tangokba noksa ka yangi angur. (Kohima, April 27, 2023)

**Kohima, Rongchii/April 27 (TYO):** Mapang talangka nungi Old Pension Scheme (OPS) dangi meyiptsü khanga aruba joko matatsü, ta New Pension Scheme (NPS) kübok Central aser State sorkar mapa inyaker temi Brehostibarnü ashi.

"NPS nungi OPS dangi meyiptsü onoki joko matatsü, kechiase NPS mapa kuma amshi tüzüker küm 18 dak tema jengugo aser 2024 Lok Sabha elections madongdang ibai mapang tajungtiba lir. Onoki ochi obendang mongura onoki sorkar melentsü meranga OPS busemba party(s) yaritsü," ta National Movement for Old Pension Scheme (NMOPS) tir aser Northeast in-charge, Dr Manjeet Singh Patel-i Kohima nung osangbener senden ka nung ashi.

January 1, 2004 nungi NPS mapa kuma amshia arudang kongshiba kibong lakh 84 aser mapa inyaker crore 8 shi lir aser item nisungtemi NPS meyiaba agitsü molungba party tem yaritsü, ta pai ashi.

NPS meyiaba agitsü asoshi

takhangba agüka 2023 küm September ta NMOPS indang state chapter temi 'March to Parliament' mera agitsü, ta pai metetdaksü.

"Central sorkar nung inyaker ajunga asoshi benokba scheme tasenba state temi amshia aruba tejenba aginer," ta pai ashi.

Confederation of All Nagaland State Service Employees Association (CANSSEA) tir Dr Ilang-ia, iba takhangba bukuma nokdaker, kechiaser Nagaland nunga 2010 nungi NPS ya amshia arur aser NPS kübok sorkar mapa inyaker nisung 32,111 permanent retirement account number (PRAN) lir, ta ashi.

"Pension ya sempet ka masü saka sorkar mapa inyaker taintem social security post retirement atema temeden ka lir," ta pai ashi.

Old pension system tanaben amshitsü atema nokdakba NPS Association Nagaland Chapter den CANSSEA dena lir, kechiaser OPS ajanga sorkar mapa inyakba nungi anisüngzüka alirtem nem pension agütsür, ta pai ashi.

"April 15, 2023 tashinung mapa inyaker 32,111 dang PRAN cards yangluogo aser iba atema government portal nung sen crore 1,300 shi dang upload sütsüogo ta angazüker," ta pai ashi.

Tanünga employees indang sen crore 3000 shi ya kong aliar memetet aser sorkari ivba sen ya account temeja ka nung rüzünga lir ta ashir, ta pai ashi.

Tangbo ibai 'virtual' sen dang lir anungji sorkari mapa inyaker tim metemdaksütsüla, ta pai ashi.

Anungji sorkari old pension scheme ya meyiaba agütsütsüla aser mapa inyaker tim metemdaksütsüla mesüra iba ken o mechi mapa inyaker sorkar anema menokdak daksütsüka, ta Dr Ilang-ia ashi.

Iba osangbener senden nung NMOPS Convenor Sudheer Rupjee, CANSSEA vice president Zubemo Lotha Tsanglao aser Nagaland National Pension Scheme Government Service Employees Forum tir Moanungsang Jamir aser ketdangpur tem dena liasü.

malitsü, ta ashi.

Asangsang nung Ahoms aser Naga nunger century aika külemi liyonga aruba ama alitsü. Tsüngremi moatsüba ali rongsen Naga nungeri bushia amshitsü. Tang aliba sorkari ya Indo-Naga ken o nung 'caretaker government' lir, anungji employment, revenue aser terenlok maparen balala indang yimym ya auer indang oshi dang lir, ta ashi.

India nung yimten yimsüsür lenirtemi 'inclusive Indo-Naga Political Solution' atema anipelem mesasai inyaker ta GoI representative temi WC, NNPGs dang osang agütsüogo. Anungji Rio mesüra Himanta, tenati company mesüra kidanger state tem nungi royalties bushia külemi totzü biushitsü atema tezüngzüktep nung zülutepbaji amajok asütsü.

WC, NNPGs ajanga GoI den yimten ken o jembiba yimya melenshiogo. Jembishinü nung Naga kin tem ka sür shilem agir, Hoho lenirtem aser civil society tem nem jembishinü tejangja metetdaksür, kechiaser onoki

nübürtem indang yimtenren tejangraba miimbanga ayuba anema nokdaker.

Nagaland nung aliba ali rongsen ajak dangar nem agütsütsü asoshi sen akba nisung kar nem temelaba agütsüba nung lendong lir, ta ashi.

Naga nunger tarutsü tia den shibai asayar? Sen tashi aser tesem ajaklen tenük shibanger tashi anga anidakba ajanga Naga nunger shisashir aika tekolok aser molungsentsü menentsüogo. Ochishir lenir aser mapa agi inyakba politics sen agi tebang nembangtsüogo. Sapang nung taka-taiter, pei kibur tenüng nung o jembir 'puppets' aika lir, saka kija süang mesüra telok-a süang, tasü taitera aika lir aser asen nübür asoshi nokdaker. Tsüngremi tasü tait kin lenir aser Naga nunger tashi-tawar moajang. Shidakba kibur aser stakeholders tem nokdaksü mapang tongogo. Naga nunger HARAKIRI mapa inyakba nungi pila alitsüla, ta WC, NNPGs sangdong ajanga ashi.



### Yimkhiung Tribal Council-i Advisor tem tushia sentong ayongzük




**Dimapur, Rongchii/April 27 (TYO):** Advisor, Youth Resources & Sports aser Chairman DPDB Shamator, S Keoshu Yimkhiung; Advisor, Fire & Emergency Services, Home Guards & Civil Defense aser Chairman SDPDB Pungro, S Kiusumew Yimkhiung; State Information Commissioner, T. Kekonhchim Yimkhiung aser Chairman, Honey Mission Obed

Yimkhiung nunger nem tenüngsang agütsüba sentong ka Yimkhiung Tribal Council ajanga GB Hall, Pungro nung April 27, 2023 nü ayongzüka liasü. Sentong nung Advisors, Keoshu Yimkhiung aser Kiusumew Yimkhiung nati iba ama sentong tulu ayongzükba atema Yimkhiung Tribal Council aser lokti tentet balala dang

pelaba lemsatop aser arok asoshi lungjemer nokdaksü ajungshia liasü. Yimkhiung nunger rongnung shisaliok nungdaker ta parnoki ashi. Obed aser Kekonhchim natia Yimkhiung nunger lenir temi masetshie parnok yariba atema pelaba lemsatopa liasü. Iba sentong nung menden YTC Executive Chairman, Makhezo liasü.

### Mkg. nung drugs ayoker tetsüdi ka apu

**Mokokchung, Rongchii/ April 27(TYO) :** Mokokchung nung drugs shibelena ayoker tetsüdi ka 26-04-2023 aonung puogo. Moayimti nunger Imtimeri jala arishi küm 33 tain drugs ayoker tetsüdi Punalemla ket nungi Sunflower (Heroin) 60.03 gram bener lia apu. Mokokchung Addl.SP & PRO Y.Tumchobemo NPS-i ashiba agi Mokokchung nung drugs shibelena ayokba lazüka



Mokokchung Police-i ita ishika tejaklen nung mita ataba mapang nung 26-04-2023 aonung 6:45 pm nung Punalemla ya Aongza Ward nung lar kidang House No.227(c) nung lia apu. Punalemla apuba dak ajemdaker Mokokchung Police Station-2 nung case Number 20/23. Under Section 22(B) NDPS nung register süa lira ser iba maparen dak sentakba bushitsüngdang(investigation) südar.

### NEZCC ajanga research atema application meshir

**Dimapur, Rongchii/April 27 (TYO):** North East Zone Cultural Centre, Dimapur kübok documentation mapa den lirumedema tsünglanglen agüja aliba fields tem nung research agitsü jangra aliba scholar tejangja nungi North East Zone Cultural Centre, Ministry of Culture, GoI ajanga application meshir. Iba research ya Arunachal Pradesh, Assam, Manipur, Meghalaya, Mizoram, Nagaland, Sikkim & Tripura state tem nung Folk & Tribal

Music & Dances aser samaa aoba art forms tem nung agitsü. Application agütsür ya India senso asütsüla aser item state nung lisopur asütsüla. Project proposals atema shimba maparen ya NEZCC ajanga tentetba Panel of Experts temi inyaksü. Application Forms aser danga osangtem tejangja state shia Office of the Directorate of Art & Culture/ Cultural Affairs mesüra Shiipgram, Panjabari, Guwahati and

Headquarter Office, Dimapur nungi meshitsü akok. Form ya NEZCC indang website <https://fiezcddimapur.org.in> aser <https://www.facebook.com/NEZCC> nunga angutsü. Application agütsü atema tatem anogoji July 28, 2023 nü asütsü aser iba sülen aruba application magizüksü. Kuli kecha magütsüi Director, NEZCC ajanga application agizüksü mesüra magizüksü temeden lir, ta sangdong ka ajanga ashi.

### Mon district DISHA senden menogo

**Dimapur, Rongchii/April 27 (TYO):** Lok Sabha Member of Parliament Tokheho Yepthomi lenisüba nung April 25 nü Deputy Commissioner Conference Hall Mon nung Mon District Development Coordination and Monitoring Committee (DISHA) senden menogo. Senden nung pai züngsemtem nem DISHA nükjidong metetdaksü aser parnok dang sorkar fund aser scheme tem shisaka amshitsü mepeshia liasü. Paisa, ketdangsurtem timba Naga nungertem lir asünung asen nüburttem tenzüksü atema iba ya maongka ka lir ta ashi.

Kidanger state tem terenlok indang ateshia jembiba mapang pai ashiba agi, district tem nung terenlok maparentem agi pa temlung masür. Pai, züngsemtem dang parnok nem nongloktsüba khuret ataloktsütsü atema bendanga agüja nendaka inyaksü ayongzüka liasü. Lokti pela agizüba o jembiba mapang Deputy Commissioner Mon Ajit Kumar Verma-i, maziügi liaka Lok Sabha MP-i iba senden nung shilem agitsü atema aruba atema kanga pelaba lemsatopa liasü. Paisa, senden nung shilem agiba atema aser DISHA inyakim dak sendakba nung Power

Points presentations agütsüba atema Department ajak dang kanga pelaba lemsatopa liasü. Senden nung Additional Director of Supply, F& CS, Mon; Executive Engineer, PWD (R&B) Mon; Executive Engineer Power, Mon; District Welfare Officer, Mon; District Agriculture Officer, Mon; Chief Medical Officer, Mon; Social Welfare Department, Mon; Executive Engineer, PHED, Mon; Project Director (DRDA) Mon aser District Horticulture Officer, Mon nungeri DISHA kübok department inyakimtem indang PowerPoint Presentations agüja liasü.

### Guru Shishya Parampara Scheme atema NEZCC-i application meshir

**Dimapur, Rongchii/April 27 (TYO):** North East Zone Cultural Centre, Dimapur ajanga sangdong ka nung ashiba agi, 2022-2023 atema Guru Shishya Parampara Scheme agitsü asoshi application meshir. Folk dance/songs, bamboo/cane/wood craft, folk theatre, woodcraft, mask making amala training agütsütettsü shisatsü tajung aliba nisung arishi küm 45 nungi 70 tsüngta candidate temi application agütsütettsü akok. Region nung tesamar aliba art forms nung tali temolung agütsütsü. Guru ama shimba sülen pa/

la ya Assistant aser (arishi küm 15-25 tsüngta) Shishyas (pezü) ama shimtsü aser parnoki küm ka atema training agütsütsü. Application den bio-data aser medena document tem pei state nung Directorate of Art & Culture/Cultural Affairs nem agütsütsüla. Application Forms aser danga osang tejangja tem NEZCC indang website [www.nezccindia.org.in](http://www.nezccindia.org.in) (<http://nezccindia.org.in/Home/Advertisement>) aser <http://www.facebook.com/nezccdimapurNE> nung angutsü, ta sangdong ajangasa ashi.

**Teshimteter nem ita shia taa yamai agütsütsü:**

Sl. No.	Particulars	Honorarium
1	Guru	@ Rs. 7,500/- per month
2	Accompanist (Assistant)	@ Rs. 3,750/- per month
3	Shishyas	@ Rs. 1,500/- per head per Shishyas.

### Kohima Police-i heroin gram 630 apu



**Dimapur, Rongchii/April 27 (TYO):** Kohima Police ajanga Khuzama Inter-State Check gate nung teti ama April 26, 2023 nü gari tem meita aoba mapang Tata Mobile ka (registration number NL-01AE-0920) Senapati, Manipur nungi Dimapur leni oyaa aliba soiter meita aodang sapon cases 50 nung miima aliba heroin gram 630 shi ngutet, ta sangdong ka

ajanga ashi. Iba temesepba mozü ya national market nung sen lakh 88 shi jenjang alitsü. Iba dak sendakba nung Manio Pfoze aser Solomon Pfoze na den gari aser temesepba mozü ya pua liasü. Iba sülen maneni bushitsüngdangtsü atema NDPS Act kübok ken o ka Khuzama Police Station nung benoka lir, ta sangdong ajanga ashi.

### Dimapur nung tashiyim amshia senotsü meshir asem apu



**Dimapur, Rongchii/April 27 (TYO):** Dimapur Police indang AET team den East Police Station nungi sepaitemi April 26, 2023 nikongdang 5:00 ako meta Blue Hill Bus Stand area, Dimapur nung dokan tem nungi tashiyim amshia sen meshiba mechi Kahoto Aye (41 yrs) S/o. Lt. Xekiye Aye, Aloto Aye (32 yrs) S/o. Nitoho Aye aser Toika Awomi (40yrs) nungertem apu, ta sangdong ka ajanga ashi.

Item nisungtem ya Innova gari (grey) B/Regd No. DL3CAM-1271 ka nung aru aser iba mapa tamajung ya inyakba sülen Khermahal leni ao. Parnok ya MST Khermahal area nung menep aser parnok ket nungi .22 pistol (country made) ana den .22 indang injang trok ngutet. Iba dak sendakba nung tapet ozüng kübok ken o ka zülüokogo aser bushitsüngdang tenzüokogo, ta sangdong ajanga ashi.



### Cabinet-i nursing college tasen 157 agizükogo

New Delhi, April 27 (Agencies): India nung ano nursing college tasen 157 amenoktsü aser college shia nungji menden 100 shi alitsü.

Brihostibarnü Ato kilonser, Narendra Modi mendenbuba ser Cabinet committee on Economic Affairs senden amendang iba telemtetbaji agiogo.

Nursing colleges ji 2014 küm nungi tenzuka amenokba medical colleges anasa lapoktsü. Nursing colleges tasen teimtibaji Uttar Pradesh nung asütsü (medical college 27), tanabuba nung Rajasthan nung 23 aser Madhya Pradesh nung nursing college 14 amenoktsü.

Union health minister, Mansukh Mandaviya-i, health workers tali nungdakba nung ajemdaker nursing colleges tasen amenoktsü telemtetba agi, ta metetdaksü.

Tang India nung B.Sc nursing seat lakh 1.2 lir.

Mandaviya-i, sorkari ketdangsüba nursing college shilem 40 jungnüabo south

tsütsü aliba state pezü nung lir, ta metetdaksü.

Bihar nungbo B.Sc nursing degree agütsüba sorkar nursing college ana dang lir aser Jharkhand nunga item ama college ka dang lir, ajisüaka UP nungbo 10 lir.

Nursing college tasen 157 amenokba ajanga sorkar senpong nungi sen crore 1,570 indoktsü, ta health minister-i metetdaksü.

Sorkari iba project ya küm ana tsüngda renemtsü sentong lir, aser iba project atema mapang telemsa balala atemzuka yur inyaksü, ta ketdangsertemi metetdaksü.

"Centre nungi Union health secretary leniba nung Empowered Committee aser state tem nung principal secretary, health/medical education-i ketdangsüa iba maparen inyaksü. States/UTs-i mapang shia Union ministry nem iba scheme kübok inyakba maparen osang metetdaksütsü," ta parnokisa metetdaksü.



April 27, 2023 nü New Delhi nung Chief of Army Staff General, Manoj Pande-i Bangladesh Army Chief, General SM Shafiuddin Ahmed agizükdang tangokba noksa nung angur.

### Temang shilem tenla agütsür nem anogo 42 sodi agütsütsü

New Delhi, Rongchii/April 27 (Agencies): Centre sorkari pei temang shilem tenlatsü melungteter central sorkar mapa inyakterem nem 'special casual leave' anogo 42 sodi agütsütsü telemtetba agiogo; tang tashi nungbo temang shilem tenla agütsürtem surgery agiba sülen anogo 30 tashi dang sodi agütsüdar.

Personnel Ministry-i sangdong ka ajanga, "Temang shilem tenlaba ya tongti surgery ka lir, aser hospital den kidang aneptsü atema mapang talangka agir," ta metetdaksü.

"Meimchir ka yaritsü atema melungtetba ya mapa tajung ka lir, anungji temang shilem tenla agütsütsü atema Central sorkar mapa inyakterem ajungmesotsü asoshi tang nungibo temang shilem tenla agütsürtem nem special casual leave anogo 42 agütsütsü atema telemtetba agiogo," ta kasa sangdong ajanga metetdaksü.

Temang shilem tenla

agütsürtem surgery tapu balala ajak agirtem nem anogo 42 tashi sodi agütsütsü aser iba sodi angutsü atema sorkar registered medical practitioner/doctor nungi shidi alitsüla, ta Personnel Ministry-i metetdaksü.

Special casual leave ji hospital nung amongba anogo nungi tenzüksü, ajisüaka medical practitioner/doctor recommendation nung ajemdaker surgery jakdang hopta ka jelia nungi iba sodi agitsü akok.

"Temang shilem tenlaba dak sendakba treatment ji akok tashi authorised hospital nung agitsüla. Authorised hospital (Central Government Health Scheme kübok empanel süa aliba government hospital mesüra private hospital) aser nija hospital nung treatment agiba indang HoD nungi medical certificate alitsüla," ta kasa sangdong ajanga metetdaksü.

### Sudan linük nungi India nunger ajak anir arutsü: MEA



New Delhi, April 27, 2023: 'Operation Kaveri' kübok tang rara adoka aliba Sudan linük nungi India nunger sensotem tayimtsü ajanga New Delhi nung aliba IGI Airport tonga anir aruba sülen tangokba noksa nung angur.

New Delhi, April 27 (Agencies): Brihostibarnü Foreign Secretary, Vinay Mohan Kwatra-i, rara aliba Sudan linük nung India nunger ka danga anungzuka meyutsütsü, ta metetdaksü.

April 15, 2023 nü Sudan nung army aser paramilitary sepai tsüngda rara tenzükba sülen India-i control rooms amenoker iba tensa mita dang repringdar, iba denji külemi India nunger nem osang metetdaksüba den tongtepretepa arudar, ta pai metetdaksü.

Brihostibarnü India nunger 367 tayimtsü nung anir arua Delhi nung aliba Indira Gandhi International airport tongogo.

Kwatra-i, India-i Sudan

kidanger linük ajak den tongtepretepdar aser Sudan nung rara aliba tesemtem nungi sensotem anitetdar, ta metetdaksü.

Foreign secretary-i, "Sudan nung India nunger 3,500 aser Person of Indian Origins (PIOs) 1,000 shi lir ta onoki asadangteter. Navy ship asempuba - INS Tarkash Port Sudan tongogo aser iba rong nungji India nunger anir arutsü," ta metetdaksü.

India nunger mission 'Operation Kaveri' dak sendakba nung Kwatra-i, tayimtsü ka ajanga India nunger 367 Jeddah yimti (Saudi Arabia) nungi Delhi airport tashi anir aruogo; parnok ajakji Port Sudan nungi Jeddah-i tama anir

oa liasü, ta metetdaksü.

Foreign secretary-isa, sensotem anitetba maparen nung Saudi Arabia-i amalitepa yariba atema parnok dang pelar, ta metetdaksü.

Kwatra-isa, tanga linüktemia parnok sensotem Sudan nungi anir arutsü atema India dang mepishidar, anungji inyakyim nung ajemdaker inyaksü, ta metetdaksü.

Tang rara adoka aliba Sudan nungi India nunger anir arutsü atema Hombarnü India-i 'Operation Kaveri' tenzuka liasü. Africa nung aliba Sudan linük nung army aser parliamentary sepaitem tsüngda anogo aika raraan arudang nisung 500 jungnüa süogo.

### Congress-i Amit Shah anema ken o agütsü

New Delhi, April 27 (Agencies): Tawa Union Home Minister Amit Shah-i, "Karnataka nung Congress-i sorkar kümra rara adoktsü" ta jembiba o aija Brihostibarnü Congress party-i police nem Union Minister anema ken o agütsü.

Congress party-i, Amit Shah-i nisung jashidaksütsü o jembir, tsükchitep adokdaksür, tesempa proker aser Opposition tenüng menüktsür, ta metetdaksü.

Union Home Minister anema ken o agütsür Congress lenirtemji- Randeep Singh Surjewala, Dr Parmeshwar aser

Karnataka Congress Tir, D K Shivakumar nunger liasü. Parnoki Bengaluru nung aliba High Grounds Police Station nung ken o agütsü.

Congress party-isa, parnoki Election Commission of India (ECI) matsüngdanga iba onük süoka jembitsü, ta metetdaksü.

Congress lenir, Jairam Ramesh-i, "BJP-i Karnataka nung tamakok mejungi angutsü, ta tangbo jangjaogo. Congress lenirtemi nüboyimbaji nüburtemi junga agizükdar. Ibaji ajanga Amit Shah indang asalentong: mezüngmeshiba, jashidaksüba, ajungmesoba aser amokmerenba jungkai

adoktsür. Shah-i aaktsüla! Onoki ECI matsüngdang iba onük benoktsü," ta metetdaksü.

Mongolbarnü Karnataka kübok Belagavi district nung nüboyimba mapang nung Amit Shah-i, "Congress-i sorkar kümra state nung terenlok aliba ya tesüleni atsüngzuka alutsü. Congress-i sorkar kümra kibong kati yimsüsüba alitsü aser Karnataka nung rara adoktsü. Congress-i sorkar kümra ochimashi tulu alitsü," ta jembia liasü.

Karnataka nung assembly election May 10 nü agitsü aser May 13 nü vote azüngtsü.



April 27, 2023 nü Jantar Mantar, New Delhi nung United Hindu Front nungi züngsemtemi kasa kiyimba anema longkak aيتدang tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 28, 2023

### Yimsüsür takarba süra !

**N**i züngsem daktsüba Whatsapp telok ka nung züngsem kati Nigeria nung lenir Peter Obi-i ashiba tebilemdangtsü o ka yamai lemsatep - "Industry lapoka mapa inyaker tem dang nungibo politics asayartemang takarba küma tajangzük anguba limaji kodanga tejakleni maotsü aser government nung yimsüsürtemji business inyaker entrepreneurs dang nungi rongsen teimba bendena takarba küma yimsü sütetra, parnokji pei lima sensak tia aitsüba tensa tia yanglurtem asütsü." Iba o ya kodang asenoki jungjunga bilemdangdir, Peter Obi-i ashiba o ya asenok dang ashir ama angaloktsüsa asenoki inyakba mapatem bilemtettsü. Atangji, asenok tsürabar sobaliba nunga arrleper nokinketer temi kodanga sü mechitetter, kechiyong parnok aluyimtsü mapang mali aser süchirtemi nokinketer mekümtetter kechiyong parnok arrleper maor. Aji oda, süchir tejangraba aser nükjidong o arrleper tejangraba o nükjidong na balala, kati takar akümtsü meranga inyaker aser kati par lima tsükchir ket nungi kümzüka ayutsü asoshi taküm ajak bendanga agüja inyaker. Kasaji, tanü putu nunga industry aser factory tapu balala lapoka inyaker tem süshia, lenmang aser kiojen yanglur contractor-tem süshia mesüra shishilembaba mapa tapu balala inyaker entrepreneur-tem süshia, parnok ajakji takar akümtsü asoshi rongsen nung tajangzük bushia inyaker tem lir. Atangji, parnok inyakbatem nungi nübertem nungdak ajak angur, aser idak nung jagi parnoka ajangazüker, iba amaji tajangzük lia ka rongsen bushiba aser bendenba mapaji meinyaktetra takoksa ajurur anentsü. Aji oda, külen yimsüsürtemji pei lima aser nübertem tetsübu aser takoksa tensa tia majurui tipdema tesünep nung lia aotsü asoshi temzüng ozüng yanglurtem lir. Parnoki tulur tilar aser takar sensaker ajak temzüng ozüng ka kübok shingaia shinga mezüngmeshii masütsü aser mashioktsüsa temzüng ozüng yanglua ketdangsertem nem nübertem anepaludaktsür. Yimsüsürtemji takar kümnertem masü saka pei lima timtem tetsübu nungi kümzüka yunertem aser pei lima aser nübertem takar küma renlokaktsütsü merangertem lir. Ibayongji, parnoki industry kiburtem, business inyaker tem aser aluyimertem asoshi sentong tajung yanglua yaritsü meranger. Ajisüaka, Peter Obi-i ashi ama, asenokbo yimsüsürtemiang rongsen tenükshiba, takar tekümnüba aser senotsüa parnokisa temeimba süra, atangji, iba jagibo pei lima asoshi rongsen renlokaktsütsü makoktsü. Aji oda, India nungertema Mahatma Gandhii külen yimten nüchiso bushir aser ano külen takar kümnü marem rongsen bushir ta asünunga komaka süla ta bilemer. Kasaji, Nelson Mandela-a külen par nübertem asoshi yimten temeten atema rarar aser külen par chirnur aser kinungertem tenüng nung contract mapa aser business inyaka takar akümtsü meranger ta-ka asü asüa tang ya South Africa nung tanak nisungtem kechi tia nung lila ta bilemer. Iba amaji, India nung yimsüsürtem rongnunga Jawaharlal Nehru, Atal Bihari Vajpayee, Dr. Manmohan Singh, APJ Abdul Kalam, Narendra Modi, Rahul Gandhi aser Mamata Banerjee nungertemi pei nübertem sensak tia nungi aniteta takar kümdaktsütsü bilemtsü melen parnokang takar tekümnüba, parnok li aser parnok lu aser parnok kiojen-ang tuluba aser teimba küma yimsü sütet nungbo, alima nung parnoksa takarba aser India-sa tesensakba ta yanglutetla ta bilemer. Aji oda, Singapore nung taoba ato kilonser Lee Kuan Yew-i ashi ama, "ni shimtettsüba tarutsü tia ana lir : Kaji ni akok tashi ochimashi mapa inyaka alima nung takartibatem rongnung nia ka asütsü aser ozü nübor ajak makamaiter kümdaktsütsü MESÜRA ni ozü lima aser nübertem shitak tenzüksü aser alima nung takartiba lima ter rongnung Singapore tendaktsütsü." Pai tanabubaji shimtetba agi tanü alima nung Singapore takar limatem rongnung züngshir. Yimsüsür ka temulungjang, nükjidong aser mapaji aji ati. Atangji, yimsüsürtembo kenyonji takar masütsüla, sen mebushitsüla, business meinyaktsüla ta masü saka Peter Obi-i ashiba ama, yimten yimsüsür mendenji industry kiburtem dang nungibo senotsü tajangzük tuluba anguba menden ka kümra, aji rongsen yanglur masü saka pei lima sensak tia-i idaktsütsü yanglur asütsü. Aji oda, business inyaker intreprenur -tem küm ter nunga sentsü maotet timtemdang, yimsüsürtembo kecha inyakmongbo maka saka manger sangwa nung takar küma inyaktetra aji pei lima asoshi temoatsü jaoker masü saka sensak tia jaoker ta Peter Obi-i asenok nem angatetdaktsüner. Atangji, mashilen nungi rongsen bendena amongba agi masü saka "Ochibai Kin ka Ajungketer" ta zülua aliba azünger aser amangertemji asenok lir.

## OLEMSABANG

### NA SHIBA ASER KOKBA AMA NISUNG ?

~ Süpongnüsang Longkümer, Darogapathar Dimapur

Naga nung rongnung Asen kini Tsüngrem metetba kuli tejangja kaji Putu menden melentep shia sarasatem makie menden malar kechaser shilang alanger shiaji khristan kaka lir ta aji agi kuli agütsür. Yamaji yimsüsürtem sentepsenchi mapang sarasatem akirang jembishinü tenzüker, amongnü tekülem sentepi aor. Arogoi mapang mapang shia anügo mongdanga sayupentsü agüja sarasatemtsür kechaser parnok nüpurtem madak yimsüsür asünung arüshi, aser shisatsü meshija bendanga sarasatemtsür. Election mapang nung nia yimsüsütsü nokdaknür ta tayongzükba mapang nüpurtem jatena sarasatemer mapa tenzüker, mongdanngi sarasatemtsütsü jaoker. Tangar kin atema mejembili saka asen Aortemi yamaji apensa inyaker külen nüpuyim tenzüker. Khrista dak amangertem ajaki temenen memenadaktsünür, lendong madokdaktsünür lumia sarasatemtsür aika lir. Nüpuyimertem rongnung kar shisa taka, kar tesangra, kar kodinemi, kar teporchi, kar samaru (She tamajung). Item rongnung shisa kartemi beia meyrur tangar-a meyrurtsür, sangrasangjirtemi yangku sünga sen sema yur she arishirtemi azü achioktsüba ama samarurtem apusudaktsür, kodinemtirtemi polling day atema sentong tapu aika yanglur ata alir, teporchi, aser tetsürpongtemi sang nung mepodaktsütsü kümtanger saka lendong adoka alidaki metsüpue pongoka air aser lendongji nemtemtsürsüngjemtsür. Election tempanger külen dakokertemi Tsüngrem aser lokdi nem tenüngsang agüja sarasatamba sentong tajung akir, asenoki ajurua arur. Tetzü Nagaland for Christ kuli agütsür saka Tsüngremi akizüker makizüker. Election mapa ren ajak tempanger külen nungi samarurtem Mozüki pushitepber. Kar tasüba ajurur, kar anarongtena kümzüker, samaru mapa inyaker temi sü-ang küm-ang ta nai shiba tepset, shir ki jen raksatsü ni tepor ta bilemer asü? election mapang inyakba mapa tamajungjibo kecha mesükshir asü? Election küm aikati metembanger ako, Tetsü tepou mapang nung-ang kin kidong tsüngta noklen mendang ataloker asü? Tanüa kasa ataloker-ako nai tepsettsürtem jagi tai adok yongpo mulung korema lir. Sangrasangjirtem nai inyakba shingaia mangur ama bilemer asü? Tsüngremi metetta lir, Pa pushira pai adoktsü tanüla kümzüksü akok, saka taabo angutsü Dawid chuba a yamaji atalokba asenoki azünger. Na shiba aser koba nisung rongnung adener? Sangküm 2024 LS Election akitsü lir Alima nung Tsüngrem San chanu dak amanger-a sang, Süngyanglu külemer-a sang Tsüngrem meyong San lir, saka shirnok Pa külemertem lir parnokji Par kidang aliba San, Yisui ashir iba San ki nung madenba kü meyong ano tanga San lir, itemji ni anir arutsüla, parnoki kü ola angatsü aser parnok Sannüker ka kübok San telok akümtsü temulungjang ajak agi pa pushirtem akizüker Yoh 10: 16,17 Tsüngrem pushiti.

Asa chubai kibuba tsüngdang kechi shidak aji inyaka aru anungji Tsüngremi pa kanga moatsü, saka tesülen pai Siria chuba Benhadadten temba yima Kibubai memulungba mapa tulu inyak, anungji Ainkar Hanani pa tang tekümtangtsü ashi nung mitadoka ainkarji tepokdak shibanga ayu aser taoshi mekai nisung kar kangshi 2 Puti 16: 7-10. Yimsüsür kümnüba kar yimden meimba, nüpur meimba saka kar tayang küpzüksü nükjitung nung apusur. Saka shibai Tsüngrem dak tera meyange bei tebilemba inyaktsü merangtir melepzüng tamajungba akümtsü. Tsüngrem tenzükertema kibuba dak temulung melemtette taküm nung aser tekülemdak naloknar kanga sapura Asa chuba dak Tsüngrem mulung machiba ama ataloktsü menua malitsü Tsüngrem metetba agi tang masü angatetba agi amanga tenzükra temoatsü ta lemsatepber Tsüngremi moajang.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**





Tsüngremi lungpak ana nung Mosa nem ozüing ter metetdaksüba tesem- Sinai tenem noksa nung angur. Mosa ozüing ter indang ya Laishiba nung Anitet kaket nung shia lir.

## Sikh nunger temeshi kaket raksatsüba atema pastor ana apu

**April 27, 2023:** Punjab state nung Sikh nunger temeshi kaket raksatsüba atema pastor ana puogo, ta osang ka ajanga metetdaksü.

Punjab nung Faridkot district kübok Golewala yimdak aliba Belivers Arogo nungi Pastor ana- Vicky Masih aser Roop Lal nati Sikh nunger temeshi lai aliba Sri Gutka Sahib kaket shisar lenmang nung indok, ta tena nem tai tonglokja April 24 nü apu.

Osangbenertem den jembidang Faridkot nung superintendent of police, Harjeet Singh-i, iba tesemnungji CCTV cameras teyari ajanga tai tonglokja alirtemji apu, ta metetdaksü.

Pastor anaji gari ka nung mena liasü aser tenati Sri Gutka Sahib kaket nungi tapak kar shisaba sülen lenmang nung indok.

District court-i tena police ket nung anogo pezünü ayutsü mela.

"Kuli tejangja metettsü atema onoki tai tonglokja alirtem dang asüingdangyatsü," ta police superintendent-isa metetdaksü.

Sikh nunger yimsü tongti tentet, Shiromani Gurdwara Parbandhak Committee-ia tai tonglokja alir ana nemji temerenshi tulu agütsütsüla, ta takhangba agütsüogo.

April 25 nü osangbener den jembidang Pastor Hanook Bhatti-i, "Sikh nunger temeshi kaket raksatsüba tatalokbaji onokia aitsür, ajisüaka pastor temi yamaji inyak, ta asübaji onoki mamanger. Iba ya tena aitsütsü atema sang toktsüba asütsüa akok, kechiyong yangji alirtemi pastor ana jagi nisung aika temelung meyipdaksür ta tai tonglokja lir," ta metetdaksü.

"Yimtenren tsütsü tajangzük angutsü atema nübur tsüingda telemsa adokdaksütsü atema inyaker telok kar lir. Parnoki asalentong yangluba ajanga iba ya atalok asütsüa akok, ta onoki melung malemer," ta pastor

Bhatti-isa metetdaksü.

Khristan temenden atema inyaker Minakshi Singh-i, "Pastor ana kümzuka alitsü atema onoki sarasademtsür," ta metetdaksü.

Nütsüing million 28 aliba Punjab state nung Sikh nunger nütsüing teimba lir aser nütsüing shilem 10 shi dang Khristantem lir.

Pastor Bhatti-i, Pakistan den arrtsü anasa aliba Khristantemi tangartem Khristan yimsü dangi meyipdaksür, ta aiben parnok nem tai tongloktsür, ta metetdaksü.

Yaküm June ita nung Sikh nunger tongti putir, Giani Harpreet Singh-i state nung yimsü meyipba ya nokdangtsüla, ta takhangba agüja liasü.

"Onok tashi meitdaksütsü atema Punjab nung Khristan yimsü proker. Punjab nung Tenla kitem aser mosques aika yangludar, aser iba ya shisabulutsü onük ka lir," ta pai ashi.

## Khristan film 'Ordinary Angels' taküm October 13 nü sayatsü

**April 27, 2023:** Taküm October 13 nü Khristan film 'Ordinary Angels' film sayatsü aser iba film yanglurtem aser shilem agirtemi, iba film nukjidong ya Arogotem dang pei tangatetba balala toktsür nüngdakbapurtem yaritsü ajungshitsü atema lir, ta metetdaksü.

Iba film ya October 13 nü Lionsgate-i sayatsü aser iba film ya Kingdom Story company-i yanglu. Parnokisa Jesus Revolution, American Underdog, I Can Only Imagine aser I Still Believe film tema yanglua liasü.

"Jesus Revolution film ya kuli ka atema süra Ordinary Angels ya mapa agi inyaksü ayongzükba film ka lir," ta film director Jon Gunn-i ashi.

Iba film nung tongti shilem agir anaji Alan Ritchson (Reacher, The Hunger Games: Catching Fire) aser Oscar award anaben angur Hilary Swank (Million Dollar Baby, Logan Lucky) na lir.

Film otsü nungji kou

anepalutsür (hairdresser) kati lokti ayongzuka sangremer ka yariba ajanga sangremersang'er jala ka shirang anepa taküm kümzük, ta Jesus Revolution film produce asürtemi metetdaksü.

Gunn-i, "Iba film otsü ya 1993 küm Louisville, Kentucky nung chichiba atalokba otsü nung ajemdaker yanglu. Alan ya mapa meranga inyaker ka aser pa kinüngtsü süadoker. Pa jala ana lir aser tanutsülaji tashidak khenyongi balaka agi shiranger aser la tezüingjang transplant atema tezüingjang tenla agütsür melira la süadoktsü. Pa medical sentsüh aika tsühloker," ta metetdaksü.

Alan medical sentsüh aotsü atema Swank-i dollar sen meyrjang aika agütsür, iba dak alia Alan'er kibong yaritsü atema lai area nung alirtema ayongsemer.

Jon Gunn-i, "Sharon Stevens aser Schmitt'er kibong otsü ajanga, asenoki tangar yariba ajanga asenok sasa asen

taneptsü anguba asenok nem nenshia metetdaksür. Tang alima den lemsateptsü osang tajungtibaji ibaji asütsü," ta ashi.

Swank-i, "Iba film ajanga asenok dang, kodak tenyartemji tesem ajaklen asenok rongnung densema lir, ta asenok nem nenshia metetdaksür. Iba denji külemi tamang, teimla, tasü-aitba aser tajung bilembaji sayatonya ataloktsü atema totzü lir," ta ashi.

"Iba otsü ya temang shilem tenlaba nung tashi tulu keta aliba otsü ka lir. Iba otsü aser osang sangdongba nung shilem agitsüsa maangka anguba atema ni kanga pelar," ta Swank-i ashi.

Ordinary Angels film nung tongti shilem agir, Alan Ritchson-i, "Ni ya tajung bilemer ka. Nisungtem dak tajungtiba aliba nung ni amanger. Asenok longjemerbo mapa tulu inyakettsü, ta asenok dang nenshia ashitsü nüngdaker. Ibayongji ni Ordinary Angels nung shilem agitsü melungtet," ta metetdaksü.

## ANOGO ABEN TSÜNGREM DEN

### Bendanga Agütsüba Ajanga Tushiba T.Ken 100:3,4

T.Ken 100ji Tsüngrem tushitsü asoshi tetuyuba agütsüba tapak lir. Tushibaji temulungjang nungi adokba mapa aser mulungsentsü lir, aser lenmang ka nung asenoki Pa nem bendanga agütsüba ajanga Pa tushir. Iba ken nung Pa nem bendanga agütsütsü leman asem sayur.

Mezüngbuba, teyangluba ka ama Teyanglur nem bendanga agütsür (t.3). Satani paji Tsüngrem ta asenoki bilemdaksüner. Kari parnokji Tsüngrem ama bilemer. Saka Yihovaji dang Tsüngrem lir (Isa. 46:9; T.Ken 46:10; 1Puti. 16:25). Asenok pei sasa yangluba masü; Tsüngremi, Pa shisatsü, ain aser taremsük agi, asenok yanglu. Nisung ka dak ali aser Tsüngrem taküm dena lir, kechiaser Tsüngremi Pa mesükba nung asenok yanglu.

Tanabuba, tanuri Tebu nem bendanga agütsüba ama asenoki agütsür. Taochi ajanga Pai asenok jatet (Ani. 19:5,6). Pa asenok asoshi asü aser asenok kümzük kechiaser Pai asenok meim. Kodang asenoki Kibuba Yisu Khrista asenok Kümtetdakba ta meimdir, asenok Pa den telungjem nung Tsüngrem asenok temeim Tebu sür tanela telungjem kibong nung atener. Asenok Pa den lungjema aliba renlok dang, asenoki Pa tashi nem bendanga agütsür.

Tasembuba, sani Sannüker nem agütsüba ama asenoki Pa nem bendanga agütsür. Sannüker Tajung (Yn. 10:11) aser Tulu (Ibri 13:20), asenok Pa santem chiyimdak chiyimba santem lir (T.Ken 73:13). Tsüngrem o, rem lanu agi mesütsüji tenüngdaksü.

Kodang nai Tsüngremji Teyanglur, Tsüngremji Tebu aser Khristaji Sannüker ta angatetta bendanga agütsüdir, nai Tsüngrem tushir. Pa nem bendanga agütsüba tetezü, nai mulungba Pai mulungba nem bendanga agütsüba aser Pa o nung tashi angaba. Tsüngrem nem bendanga agüjang- Pai na meimtsü aser anüksü.

## Pope-i synod senden nung tetsür nem vote temeden agütsür

**April 27, 2023:** Roman Catholic Church puti otsü nung tang mezüing Arogoi telemtetba agiba nung tetsürtemia shilem agitetsü, kechiyong taküm October ita nung tongti putirtem senden nung vote agütsütsü atema Pope Francis-i tetsürtem nem temelaba agütsüogo.

Synods senden nung tetsürtem auditors ama adentsü temelaba agütsür, ajisüaka tetsürtem nem vote temedenbo magütsü liasü.

Tang mezüing Roman Catholic Arogo nung sister pongui item senden nung vote agütsütsü.

Synod senden nung adentsü atema Pope Francis-isa Vatican document ka bendenloktsü telemtetba agiogo; iba kübok national bishops' conferences-i shimba

putir, sisters, deacons aser Arogo züingsem 140 nungi 70 shimtsü aser parnok 70 nungjagi shilem 50 bo tetsürtem asütsü.

Synods nung nisung 300 shi adener, ajisüaka bishops nem ang vote temeden agütsür.

Yaküm Pope Francis-i Vatican nung tongtibang menden balala nung tetsürtema shimoktsü telemtetba agi liasü aser tang synods nunga tetsür nem vote temeden agütsür.

Arogo nung tetsürtemi synods nung parnok nem-a vote temeden agüjang, ta küm aika takhangba agüja arudar.

2021 küm Pope Francis-i Sister Raffaella Petrini nem Vatican nung temaba menden ka agüja liasü aser kasa küm nungjisa Italy tsür nun, Sister Alessandra Smerilli-a Vatican development office nung shima liasü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Pua**

(adj) atsüa arua nükshidaktsüba tashi (charm)

\* La ola tajung agi nisung ajak **pua**.

**Pua**

(n) tsüraburtemi tsük metetdang amshiba molok (traditional measuring basket)

\* Kibong shiai arogo nem tsük pua anana tenla agütsü.

**OLONG PAITEP # 6498**

1		2		3		4		5
				6		7		
8								
						9		
			10					
11								12
				13			14	
15								
16								
						17		

**TIPLÉN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6497 TELANGZÜBA**


**TIPLÉN :**

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**Agüja aliba noksa nung meputepi aliba 10 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jella e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Tripura: Küm 2 sülen Srinagar Border Haat lapokshitsü**



Srinagar Border Haat (File photo)

**Agartala, Rongchii/April 27 (Agencies):** Tripura kübok Srinagar district nung amenoka aliba Border Haat May 9 nü lapokshitsü. Iba haat ya Covid-19 wara poktetba ajanga küm ana tashi shibanger liasü.

Border Haat management committee senden ka amenba sülen iba telemtetba ya agia

liasü. Iba senden nung South District Tripura administration nungi ketdangsürtem aser Bangladesh kübok Feni district administration nungi ketdangsürtemi shile agia liasü.

Committee-i, linük ana nungi osettsüt alir 2400-i (linük anaprongla nungi 1200) anogoshia iba Haat

sem dangdaksütsü asoshi melatsü aser India aser Bangladesh naprongla nungi yokayatsüyar 54 nem parnok indang osettsüt aser chiyongtsütem ayoktsü asoshi melatsü telemtetba agiogo.

Linük anaprongla nungi ketdangsürtemi yokayatsüyar ajungkettsü aser tetsürtem atema metsümeshidak yanglutsütsü atema sensaksema liasü.

Srinagar Border Haat lapokshiba ajanga shishilembaba nung teyari agütsüba dang masü saka kidanger linük ana nung aliba nüburtem tali tajungba sendakteptsü atema maongka agütsütsü.

**Assam: Khalistani pusemer kinungertem Dibrugarh tongogo**

**Dibrugarh, Rongchii/April 27 (Agencies):** Dibrugarh Central Jail nung yua aliba Khalistani pusemer parnok ti indang kinungertem parnok den ajuruteptsü atema Punjab nungi Brehostibarnü Dibrugarh tongogo.

Tepuokdak yua aliba Khalistani pusemertem rongnungi Kulwant Singh Dhaliwal, Varinder Singh Johal, Gurmeet Singh Bukkanwala, Harjit Singh, Bhagwant Singh Bajেকে, Basant Singh, Gurinderpal Singh aser Papalpreet Singh nunger kinungertem iba telok nung densema lir.

Kinungertemi tepuokdak yua alirtem den ajurutepogo.

Iba telok ya Shiromani Gurdwara Parbandhak Committee (SGPC) executive züngsem aser nüngtugu obendanger Bhagwant Singh Sialka-i anir aru.

Pa indang client den ajurutepba sülen advocate Simranjit Singh, shiba Kalsi tenüng nung nokdaker pai, "onoki Chandigarh High Court nung National Security Act (NSA) anema ken o benokogo," ta ashi.

"Punjab nung aliba nüburtem atema, NSA Act ya Sikhs nunger anema amshioigo aser iba sülen northeastern state tem aser Jammu & Kashmir nung

amshioigo.

"Onok client tem apuba sülen parnok pei aliba tesem adena anirogo," ta pai ashi.

"Supreme Court-i meimchir temeden anema inyaksangshiba anema tetuyuba tesashi agütsür lir.

"Parnok taoba mapang ozüng raksaba record kecha meliaka iba ken o nung District Magistrate-i Assam sorkar nem ghonda ishika tsüngda temelaba agütsü," ta advocate Singh-i ashi.

Tang self-styled radical preacher Amritpal Singh densema Waris Punjab De züngsem 10 tepuokdak yua lir aser parnok ajak NSA kübok aitsüoigo.

**Mizoram: Tepuokdak nungi jena aoba Myanmar nunger 3 puogo**

**Aizawl, Rongchii/April 27 (Agencies):** Lunglei district jail nungi tawa jena aoba Myanmar nunger pongu rongnung asembo puogo, ta police sangdong ka ajanga metedaktsü.

Tepuoker pongu shirnok Myanmar nungi lir parnok April 19 nü tepuokdak takdang ka nung metsümeshidak wall rakpoker district jail nungi jena liasü.

Police sangdong ka ajanga ashiba agi, tepuoker tepuokdak rakpoker jena aoba sülen parnok jenoka aliba tesema jangja tanaben pushitsü atema

takokba tashi jenjang agidar aser state ajak nung parnok bushi tenzüka liasü.

State police-i kanga meranga inyakba sülen tepuokdak nungi jena aoer parnok pongu rongnung asem pua Lunglei district jail-i tanaben yokogo, ta kasa sangdong ajanga metedaktsü.

Jena aoer Lalbawihliana (27) aser Dokapthang (26) na Mausen yimtsüng nung alirtemi April 20 nü apu aser state police nem bandanga agüja liasü.

Tepuoker ana ya methamphetamine bena aliba

ngutetba sülen apu aser tena anema ken o benokogo.

Jena aoer rongnung Myanmar kübok Tahan nungi Lalchawimawia (24) Hombarnü puogo, ta police-isa ashi.

Pa ya taoba küm tetsür ka tepsetba atema pua liasü.

Jena aoer ano ana tashi kong ali mejangjai lir aser police temi tena aputsü atema maneni inyaksangshidar.

State police-i nüburtem dang tepuokdak nungi jena aoertem pushitsü atema takokba tashi teka amteper inyaktsü aser teyari agütsütsü asoshi mepeshia metedaktsüoigo.



North Shillong MLA Adelbert Nongrum-i Meghalaya sorkar dang anogo 15 tsüngda Harijan colony nung alirtem tangaleni anintsü aser iba tesem nung tenokdangtsü balala tokja aliba agintsü khangogo. Hynniewtrep Youth Council (HYC)-i sensaksem takok ngua makatetra iba tesem nung alirtem mintoktsüla ta shiogo.



# Nuclear nok-nü atema US aser South Korea tezüngzüktep yanglu

**Washington, Rongchii/ April 27 (Agencies):** North Korea-i nuclear agi amokmerenba langzüksü atema United States aser South Korea tsüngta tongtipang tezüngzüktep ka yangluogo.

Washington-i mapang shia South Korea dangi Us nuclear-armed submarines yoktsü aser nuclear sentong balala nung Seoul tendaktsütsü molunga liasü.

Iba melen South Korea-i par sasa nuclear nok-nü meyanglutsü pangjem.

Washington Declaration yagi North Korea nungeri amakba nungi kumzüksü asoshi allies tem teyaritep nung tashi itshtsü, ta US Tir Joe Biden-i ashi.

North Korea ket nung nuclear nuk-nü aliba atema linük anaprong nung tebilemtsü akar.

Pyongyang-i tactical nuclear weapons yanglur aser iba yagu South Korea nung kongshitsü aser US mainland atongtsüsa long-range weapons tem yanglushir.

South Korea bukuma nokdaksü asoshi US ya tezüngzüktep ka akhi mapang yanglua lir aser nungdakra nuclear nok-nü amshitsü tawa nangzüka liasü. Saka South Korea nung karibo yangji tamang makar aser linük nung pei indang nuclear sentong tenzüksü ajungshia arur.

South Korea Tir Yoon Suk-

yeil ya White House nung liasü aser paia Washington Declaration ya US-i tembar linük tem kumzüka ayuba nung defence tsütsü tashi itshtsü asoshi nuclear nok-nü amshitsüba densema lir, ta shia liasü.

US tangatetba nung China mepelaba tejangja lir aser parnoki tensa tamajungba kumdaktsür, rara mesür aser amokmerener, ta shia liasü.

Ita aika jembishinia aruba sülen tezüngzüktep tasen ya yanglu, ta senior administration ketdangsur kati ashi.

Tezüngzüktep tasenba kübok US-i defence tsütsü nangzüka ama tali jangja nuclear-armed submarine ka South Korea-i yoktsü aser iba den ano nuclear-capable bombers tem densema danga tongtipang osettem yoktsü, koba küm 40 nung tang mezüngbuba alitsü.

Nuclear planning ken o jembishinitsü atema linük ana tsüngta Nuclear Consultative Group ka tentetsü.

Seoul nung yimten yimsüsür temi mapang talangka nungi Washington dang North Korea anema nuclear nok-nü koma aser kodang amshitsü, item asoshi sentong yangluba nung dendakjang ta ajungshia arua liasü.

North Korea indang nuclear arsenal tuluba aser tajungba akumba mechi Biden-i kechi ajanga par tenüng nung

nuclear button nung anemtsü ta shisabolua bilemtsü tenzük. Washington-i Seoul senzuka yutsütsü akok ta tetsübo nung South Korea nunga nuclear nok-nü yanglutsü ola adok tenzük.

Ajisüaka January ita Yoon-i Washington nung ketdangsurtem saksalemdakja küm aika sülen iba ken o jembite tenzük.

O jembiba aser yimya sayuba kisung agi kecha mesütetsü aser South Korea-i par sasa bomb yanglunüba mesüzüksü atema langka tejangja kar sayutsüla, ta US asoshi tejangja akum.

**Maneni**

Yoon-ia terenlok tejangja ka bener ang kidangi meyiba shilangtsü ta shia liasü.

**Nuclear Consultative Group** yagi mesaka aliba nung anakshir, South Korea sorkari asungdanga aliba ama tali shilem agidaktsütsü.

Saka tasungdanga tulubaji, iba yagi nübur tebilemba tongtsür asü masü.

(*Tapak 8 nung...*)

# Sudan nungi lisopurtem anintsü atema China-i navy yokogo

**Beijing, Rongchii/April 28 (Agencies):** Sudan nung mepetmesü tulu adoker aliba mapang lisopurtem anintsü atema China-i navy yokogo, ta defence ministry-i Brehostibarnü sangdong ka ajanga metetdaksü.

Linük aikati Sudan nungi embassy staff aser lisopurtem aninogo aser anintsü merangdar, kong army aser paramilitary na raratep tenzükba sülen nisung aika tepsetogo aser iba den tzü, chiyongtsü, mozü aser totzü agi anünga kümogo.

Mongolbarnü ghonda 72 atema ceasefire benokba sülen linük balalai lisopurtem anintsü atema kanga aritepa inyaktepdar.

"Sudan nung tensa tamajungba küma odar," ta China defence ministry otongdar Tan Kefei-i ashi.

Sudan nung China nunger aser parnok rongsen kümzüka ayutsü atema Bodhbarnü navy yokogo, ta pai ashi.

Hombarnü China-i, parnoki lisopur mezüngbuba telok aninogo ta ashiba den Sudan nung China nunger 1,500 shi lir ta ashi.

Ajisüaka lisopurtem anintsü

asoshi rong kwi yok iba indang osang tejangja magütsü.

China-i ashiba agi, parnok ya shishilembaba tsütsü Sudang indang partner tulutiba lir aser 2022 küm teyongtsü tashi nung China nunger company 130 dak temai Sudan nung senotsü intokogo.

April 25 nungi 27 tashi nung China nunger 800 shi Sudan nungi anintsü ta foreign ministry otongdar Mao Ning-i Bodhbarnü metetdaksür liasü.

Nisung 300 dak tema Sudan nungi kidanger linüktemiogo, ta laisa shisem.

Sudan nung iba rara nung tang tashi nung nisung 512 süogo aser nisung 4000 dak tema yiruogo, ta Sudan indang health ministry-i metetdaksü.

UN agencies temi ashiba agi, Sudan nungertem aika Chad, Egypt aser South Sudan-i jenaogo.

Linük yimtiba Khartoum nung international airport inyaksangshi mesüi akümba sülen bendangertem aika tanga airport tem nungi anindar.

Maneni Khartoum nungi km 850 shi pilar aliba Port Sudan nungia nüburtem anindar.

Indonesia indang military

tayimtsü kati Bodhbarnü Port Sudan nungi

Indonesia nunger 110 Saudi kübok Jeddah yimti-i anirogo, ta foreign ministry-i Brehostibarnü tweet asü.

Tang tashi nung Sudan nungi Indonesia nunger 667 aninogo.

# Ukraine: Mykolaiv yimti nung nisung 1 tepset, 23 yiru

**Kyiv, Rongchii/April 27 (Agencies):** Russia nungeri Brehostibarnü anepdang züngia missile amshia Ukraine kübok Mykolaiv yimti nung apartment block ka aser kitem amakba sülen nisung ka tepsetogo aser tanur ka densema nisung 23 yiruogo, ta ketdangsurtemi metetdaksü.

"Aonung sangwa Russia nungeri Mykolaiv nung bomb pokloktsüogo, kong Black Sea nung khaketa yokba Kalibr missiles pezü densema lir," ta tir Volodymyr Zelenskiy-i ashi.

# MULUNGEN O



Asüba Anogo - 24/04/2023

"Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong."- Rom 14: 8

Ozüi teti meima aliba asür I Alem Aier shirangba mapang nungi tenzüka iba alima nungi pilaba anogo tashi onok timtem aser mangyim tia nung alidang nenok sarasadem, temeim aser rongsen ajanga onok yarinung nenok ajak dang kanga pelaba lemsateper. Asen tebu Tsüngremi kotaker temoatsü agi nenok ajak maojangma aji onok sarasadem.

~Temeim Kinüngtsü, Chirnur aser Semchirtem

**ALL INDIA INSTITUTE OF MEDICAL SCIENCES NEW DELHI**  
 Nursing Officer Recruitment Common Eligibility Test (NORCET) 4  
 Notice No. 76/2023 Date: 12.04.2023  
 www.aiimsexams.ac.in

AIIMS New Delhi aser danga AIIMS nung vacancy aliba ama Group-B nung Nursing Officer posts atema Nursing Officer Recruitment Common Eligibility Test (NORCET) 4 asoshi Online Application meshir, koba Level 07 in the Pay Matrix pre-revised Pay Band-2 of Rs 9300-34800 with Grade Pay of Rs.4600/- nung alitsü. **On-line application ya AIIMS indang web site www.aiimsexams.ac.in nung 12.04.2023 nungi 05.05.2023 nikongdang 5:00 ako tashinung agütsütetsü.**

Eligibility Criteria for appearing in NORCET	
Essential Qualification	
I	a. B.Sc. (Hons.) Nursing / B.Sc. Nursing from an Indian Nursing Council/State Nursing council recognized Institute or University OR B.Sc. (Post-Certificate) / Post-Basic B.Sc. Nursing from an Indian Nursing Council/State Nursing council recognized Institute/ University. b. Registered as Nurses & Midwife with State / Indian Nursing Council
OR	
II	a. Diploma in General Nursing Midwifery from an Indian Nursing Council/State Nursing council recognized Institute / Board or Council b. Registered as Nurses & Midwife in State / Indian Nursing Council. c. Two Years' Experience in a minimum 50 bedded Hospital after acquiring the educational qualification mentioned above as applicable for all Participating AIIMS.
Remarks - The required two years of experience as in above is as an essential criterion and to be valid, the experience shall must be acquired after obtaining Essential Qualification, i.e. after completing residency period of the course, declaration of result & registration with State/Indian Nursing Council.	

**Age Limit: For all AIIMS: Between 18-30 Years. (As per detail on Age relaxation given in General Conditions subject to age Relaxation as per Recruitment rules of respective Institutes/Hospitals.)**

All age shall be counted on the last date of closing of application form.

**APPLICATION FEES:**

A) General/OBC Candidates	-	Rs.3000/- (Rupees Three Thousand only)
B) SC/ST Candidates/EWS	-	Rs.2400/- (Rupees Twenty-Four Hundred only)
C) Persons with Disabilities	-	Exempted

- The candidate can pay the prescribed application fee through DEBIT CARD/CREDIT CARD/NETBANKING. Transaction / Processing fee, if any, as applicable, will be payable to the bank by the candidate.
- Application fee once remitted shall not be refunded under any circumstances.
- Applications without the prescribed fee would not be considered and summarily rejected.
- Application Fees of SC/ST candidates who appear in the Examination will be refunded after declaration of results in due course of time.

**Online (CBT) mode Examination Date: 03<sup>rd</sup> June, 2023 (Saturday)**

Please visit AIIMS website [www.aiimsexams.ac.in](http://www.aiimsexams.ac.in) to apply online & for latest information.

CBC 17112/12/0004/2324



### Mkg. nung U-20 Football Running Trophy Revenant FC-i benogo



Moanungsang Memorial Sporting Club aser Revenant FC, Mokokchung semtepa ayongzükba 1st U-20 Revenant Football Running Trophy takok marok abener Revenant FC pur den tetushi tejaoker Asst.Planning Officer Govt. of Nagaland Wb.N.Chuba Phom külemi tangokba noksa nung angur.

**Mokokchung, Rongchii/ April 27 (TYO) :** Imkongmeren Sports Complex Mokokchung nung Moanungsang Memorial Sporting Club aser Revenant FC, Mokokchung semtepa ayongzükba 1st U-20 Revenant Football Running Trophy takok marok benogo.

Iba Trophy nung team ajak agi 16-i shilem agi tanu April 27 nü final Revenant FC aser Youngster FC tsüngda asayaba nung Revenant FC-i goal 3-1 agi Youngster FC kokteta 1st U-20 Revenant Football Running Trophy takok marok benogo.

Tanu iba trophy sbibangba sentong nung tetushi tejaoker Asst.Planning Officer Govt. of

Nagaland Wb.N.Chuba Phom-i mapang tatsüka agia jembidang arishi küm 20 aser tekübok purtem asoshi football asaya tetoktepa nung shilem agitsü asoshi maongka monguteti aruogo saka nenoki tang maongka anguba ya nenok takum asoshin temoatsüta angatetang aser iba tournament ayonger nema tenungsang agutsüsü tetemsüta ashi.

Chuba Phom-isa arishi küm 20 aser tekübok purji tangazükba mapang, football asaya nung nisung takum jenjang renloka tebok sünga lia aotsü lenmang sadema lir nungji nenoki nenok takum azüoka aser ajemalua alitsüla aser talisa machi majemtsü nungi pila-a alitsülata asayar lanurtem

ajungshia ashi.

Iba sentong nung Moanungsang Memorial Sporting Club President B.Luin Aier-i tepela o jembi aser Zülumanen Jamir-i sempet-tem achayanga agutsüba den sentong nung Tsüngrem lenisüba jazüka Imcharen-i sarasadem aser Lawrence Imchen ketdangsüba nung iba sentong agi.

**Iba Trophy nung jurila sempet angurtem yamai liasü:**

1. Best Goal keeper - Imsütoshi(Revenant FC)
2. Best Defender - Imlisünep(Youngster FC)
3. Player of the Tournament - Nungshijujang(Revenant FC)
4. Disciplined Team - Ao Temelung FC

### BCCI central contracts: Richa, Jemimah na temaba jenjangi ajungketogo

**New Delhi, Rongchii/April 27 (Agencies):** Wicket-keeper batter Richa Ghosh aser Jemimah Rodrigues na 2022-23 season atema BCCI central contracts nung B category-i ajungketogo, ajisüaka Shikha Pandey aser Taniya Bhatia na nembo contract magütsü.

Contract ya October nungi September tashi atema agütsür, saka BCCI-i iba osang Brehostibarnü sangdongogo.

A category nung aliba asayar nem match fees medeni lakh 50 agütsür aser B aser C category nung aliba asayartem nem sen lakh 30 aser lakh 10 agütsür.

Board-i temaba jenjang nung asayar asem dang yua lir, kong captain Harmanpreet Kaur, nungtugu batter Smriti Mandhana aser all-rounder Deepti Sharma nunger densema lir.

Parnok asemprongla maneni A category nung lir aser kasa mapang nung Rajeshwari Gayakwad B category-i ludaktsüogo. Leg spinner Poonam Yadav shiba taoba küm A category nung liasü la nem contract magütsü. La tatamsa India atema 2022 küm March ita asayaogo.

Pacer tejen Shikha Pandey, shiba South Africa nung T20 World Cup atema anisema liasü la aser wicket-keeper Taniya Bhatia na nema contract magütsü.

Pacer Renuka Thakur, shiba taoba küm contract maliasü, la B category nung züngoksemogo.

Richa Ghosh aser Jemimah Rodrigues na C nungi B category-i tuogo. C category nung taküm tasen shimertem rongnung pacer Meghna Singh,

batter Devika Vaidya, opener S Meghana, Radha Yadav, left-arm pacer Anjali Sarvani aser batter Yastika Bhatia nunger densema lir.

BCCI-i taoba küm tetsür asayartem nem kasa taa agütsüsü asoshi sangdongogo aser parnoki asayar 17 nem contract agütsüogo.

**Category balala nung asayartem:**

**Category A:** Harmanpreet Kaur, Smriti Mandhana aser Deepti Sharma

**Category B:** Renuka Thakur, Jemimah Rodrigues, Shafali Verma, Richa Ghosh, Rajeshwari Gayakwad

**Category C:** Meghna Singh, Devika Vaidya, S Meghana, Anjali Sarvani, Pooja Vastrakar, Sneha Rana, Radha Yadav, Harleen Deol aser Yastika Bhatia.

### Nuclear nok-nü atema US aser South Korea...

(Tapak 7 nungi...)

North Korea-i amak ka asünungbo South Korea kumzüksü atema nuclear nok-nü amshitsü ta US nungi telangzüba tejanga ka agüja mali.

Ajisüaka Bodhbarnü Biden-i, "North Korea-i United States mesüra allies aser partner anema nuclear agi makra ajibo khenyongi magizüksü aser iba ama mera agir yimli tatem kumsütsü," ta shia liasü.

Iba temelen US-i South Korea dang nuclear maliba linük ka ama alitsü aser nuclear

noknü tali meyaglutsü asoshi jembir linük ka ama alitsü akhanger. South Korea-i nuclear mamshitsü asoshi mesüzüksü ya US asoshi tongtipang ama bilemer, kechiaser parnoki memesüzüktetra danga linük temia yanglua amshi tenzüksü.

Ajisüaka US-i nangzükba yagi South Korea indang ruling party züngsem, tashi temeteter aser scientist tem temolung masütsü mesüka lir.

US-i North Korea ya

jembishinüba langpangi arudaktsütsü meranga maneni inyaker, ta Tir Biden-i ashi. Jelia teinyaktsü kar merenemi jembishinütsü atema aiben asüngdangba Pyongyang-i senzüka yutsü, ta Washington-i ashir.

North Korea-i nuclear nok-nü yutsütsü asoshi mesüzüksü US dak teimla liasü, saka taoba küm North Korea lenir Kim Jong Un-i par linük indang nuclear jenjang melenshitsü makok, ta sangdonga liasü.

### Sheffield United Premier League-i iogo

**Rongchii/April 27, 2023 (Agencies):** Bodhbar nü Sheffield pur takok dangi ania Bramall Lane nung West Bromwich Albion goal 2-0 agi akokba sülen Sheffield United pur Premier League-i tanaben iogo.

Paul Heckingbottom-i aniba team nungi asayar Sander Berge aser Anel Ahmedhodzic nati goal kaka idaktsüba sülen asaya asem asayatsü anunga lia parnok Championship nung tanabuba automatic promotion spot nguteta liasü.

Tanabuba jenjang nung aliba United puri taob asaya tenet nung asaya trok koka alizüng tongtetogo aser parnok tsembuba jenjang nung aliba Luton dang nungi point tenet agi timba kümogo, shirnok asaya ana dang asayatsü anunga lir.

Blades pur 2021 küm top flight nungi relegate asü aser taoba season Championship play-off semi-finals nung Nottingham Forest-i tsükdakja liasü.

Ajisüaka Heckingbottom-i

tanabuba season nungbo Sheffield pur takok dangi ania temaba jenjang nung asayatsü atema maongka ngutetogo.

EPL-i aiba taa ya Blades pur atema taruba season asem tsüngda pound million 170 asütsü.

Iba season United puri kanga junga asaya aruogo aser Heckingbottom-i aniba team ya asayamung tepeyong mapang timbaka tanabuba jenjang nundang liasü.

Taküm parnok FA Cup semi-finals tonga asayaogo. Parnoki round pongububa nung Tottenham madak takok angu ajisüaka Honibarnü Manchester City goal 3-0 agi mekoki liasü.

Burnley puri goal 1-0 agi Blackburn pur koka Championship title abenba sülen ghonda 24 dang lir United pur EPL nung asayatsü asoshi jangja aküm.

Burnley puri iba season Championship amokbanger asayaogo aser parnok tanabuba jenjang nung aliba United dang nungi point 10 agi timba liasü.

### Nüngtugu Boxer Kaur Singh süogo



Singh-i, New Delhi nung 1982 Asian Games nung heavyweight boxing gold medal ngua liasü.

Iba ita Punjab sorkari school curriculum nung nüngtugu asayar pezü indang taküm otsü bendenloktsü sentong aliba sangdonger liasü aser asayar pezü rongnung Kaur Singh-a densema liasü.

Tanga asayartem rongnung Olympian Balbir Singh Sr, nüngtugu athlete Milkha Singh aser India nunger rongnung Arjuna Award mezüngbuba angusang aser Olympian athlete Gurbachan Singh Randhawa densema liasü.

Parnok indang taküm otsü ya Classes 9 aser 10 physical education textbook nung bendenlokogo.

Asükhu lemsatepba mapang Finance Minister Harpal Cheema-i, "Kaur Singh asüba ya linük asoshi takoksa tulu lir. Ni ketdangsürtem dang pa tasü mang par yimtsüngi bener aotsü atema jenjang tapet agitsü tuyuogo. Onoki par kibong nem takokba tashi teyari agütsüsü," ta ashi.

Pai takok tajung anguba atema Kaur Singh nem 1982 küm Arjuna Award aser 1983 küm Padma Shri agütsü aser 1988 küm Vishisht Seva Medal agüja liasü.

**Rongchii/April 27, 2023 (Agencies):** Asian boxing champion Kaur Singh, shiba nungtugu boxing asayar Muhammad Ali den exhibition match ka asaya liasü, pa Brehostibarnü Haryana kübok Kurukshetra nung mozüki ka nung süogo. Pa arishi küm 74 liasü aser temang nung timtem balala aliba ajanga temang anepalua liasü.

Indian Army toktsüba sülen pa Punjab kübok Sangrur district nung par yimtsüng Hanal Khurd nung lia liasü.

Singh-i 1982 Asian Games densema international asayamung balala nung gold medal trok ngur liasü.

Pa indang career nung ajaki bilemetetba asaya ya 1980 küm January 27 nü Delhi nung nungtugu boxer Muhammad Ali den round pezü exhibition match ka asayaba ya asütsü.

**BILEMDANGANG**  
**"Na tajung asüba agi tenzüksü masü saka tajung akümtsü atema tenzüksüla."**